



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 30. redovnoj sjednici održanoj 23. maja 2018. godine, usvaja

ZAKON
O IZMJENAMA I DOPUNAMA ZAKONA O SOCIJALNOJ ZAŠTITI
BRČKO DISTRIKTA BOSNE I HERCEGOVINE

Član 1

U Zakonu o socijalnoj zaštiti Brčko distrikta BiH (Službeni glasnik Brčko distrikta BiH, brojevi: 01/03, 04/04, 19/07 i 02/08) član 11 mijenja se i glasi:

„Član 11

Nosilac socijalne zaštite na području Distrikta je Vlada Brčko distrikta BiH, a sredstva za ostvarivanje prava iz socijalne zaštite osiguravaju se iz budžeta Distrikta.“

Član 2

Član 23 mijenja se i glasi:

„Član 23

Samohranim roditeljem smatra se roditelj koji se sam stara o djetetu, pod uslovom da dijete nema priznato roditeljstvo drugog roditelja, da je drugi roditelj umro, proglašen umrlim, nepoznatog boravišta najmanje šest mjeseci, te ako mu je oduzeto roditeljsko staranje i ako mu je oduzeta ili ograničena poslovna sposobnost.“

Član 3

Član 27 stav 2 mijenja se i glasi:

„(2) Vlada Brčko distrikta BiH, kao nosilac socijalne zaštite, može proširivati krug korisnika socijalne zaštite iz prethodnog stava, u skladu s planovima razvoja socijalne zaštite.“

Član 4

U članu 31 stavu 1 tački 1 iza riječi: „na području Distrikta“ dodaju se riječi: „najmanje dvije godine od dana podnošenja zahtjeva.“

Član 5

U članu 32 stavu 1 tački 1 iza riječi: „Distrikta BiH“ dodaju se riječi: „najmanje dvije godine od dana podnošenja zahtjeva.“

Član 6

Član 43 mijenja se i glasi:

„Član 43

(1) Pravo na dodatak za njegu i pomoć drugog lica ima lice starije od tri godine koje je paralizovano, oboljelo od distrofije i srodnih mišićnih i neuromišićnih oboljenja, oboljelo od multiple skleroze, teško ometeno u psihičkom razvoju, slijepo ili nepokretno, licu kojem je neophodna stalna njega i pomoć drugog lica, djeca sa rijetkim oboljenjima pod uslovom da ovo pravo ne mogu ostvariti po drugom osnovu i da ne koriste pravo na smještaj u ustanovu socijalne zaštite na teret budžeta Distrikta.

(2) Pravo iz stava 1 ovog člana može se ostvariti kao trajno ili privremeno pravo.

(3) Pravo iz stava 1 ovog člana mogu ostvariti lica koja su potpuno ili djelimično zavisna o njezi i pomoći drugog lica u zadovoljavanju osnovnih životnih i fizioloških potreba.

(4) Dodatak za njegu i pomoć drugog lica utvrđuje se na osnovu nalaza i mišljenja stručne ljekarske komisije iz člana 34 ovog zakona i to:

a) za djecu od 3 do 18 godina, Komisija za kategorizaciju psihofizički ometene djece i omladine u razvoju;

b) za punoljetna lica, Stručna ljekarska komisija za utvrđivanje nesposobnosti za rad lica koja traže socijalnu zaštitu na području Brčko distrikta BiH;

c) za djecu sa rijetkim oboljenjima, stručna ljekarska komisija koja će pravilnikom o svom radu propisati kategorije djece sa rijetkim oboljenjima.

(5) Nalaz i mišljenje iz stava 4 tačke a) donosi se na osnovu Odluke o otkrivanju, ocjenjivanju sposobnosti, razvrstavanju i evidenciji djece i omladine s posebnim potrebama.

(6) Nalaz i mišljenje iz stava 4 tačke b) donosi se na osnovu Pravilnika o ocjenjivanju sposobnosti lica u postupku ostvarivanja prava iz socijalne zaštite.

(7) Utvrđivanje zavisnosti od drugog lica vrši se na osnovu Bartelovog indeksa aktivnosti svakodnevnog života i on može biti u kategoriji: potpune zavisnosti, teške zavisnosti, umjerene zavisnosti i male zavisnosti.

(8) Pravilnik o ocjenjivanju sposobnosti lica u postupku ostvarivanja prava iz socijalne zaštite iz stava 6 ovog člana donosi Vlada na prijedlog šefa Odjeljenja.“

Član 7

Iza člana 43 dodaje se novi član 43a koji glasi:

„Član 43a

Novčani iznos za visinu dodatka za njegu i pomoć drugog lica obračunava se za:

a) potpunu zavisnost u visini 25% (dvadeset pet posto) od prosječne plate ostvarene u Distriktu u prethodnoj godini,

b) tešku zavisnost u visini 18% (osamnaest posto) od prosječne plate ostvarene u Distriktu u prethodnoj godini,

c) umjerenu zavisnost u visini 12% (dvanaest posto) od prosječne plate ostvarene u Distriktu u prethodnoj godini,

d) malu zavisnost u visini 7% (sedam posto) od prosječne plate ostvarene u Distriktu u prethodnoj godini.“

Član 8

U članu 68 iza riječi: „Skupština“ dodaju se riječi: „pravno ili fizičko lice u skladu sa zakonom i drugim propisima.”

Član 9

U članu 81 iza stava 5 dodaje se novi stav 6 koji glasi:

„(6) Izuzetno od stava 5 ovog člana, ustanove za odrasla i stara lica, kao i ustanove za dnevni boravak korisnika socijalne zaštite, mogu osnovati pravna ili fizička lica.“

Član 10

Iza člana 108 dodaje se novi član 108a koji glasi:

„Član 108a

Odjeljenje za zdravstvo i ostale usluge, Pododjeljenje za socijalnu zaštitu (u daljnjem tekstu: Pododjeljenje za socijalnu zaštitu) dužno je, u roku od šest mjeseci od dana stupanja na snagu ovog zakona, izvršiti reviziju predmeta korisnika prava na dodatak za njegu i pomoć od drugog lica, u skladu s članovima 43 i 43a ovog zakona.“

Član 11

Iza člana 109 dodaje se novi član 109a koji glasi:

„Član 109a

Pravna lica koja pružaju usluge smještaja za odrasla i stara lica, socijalno zdravstveno zbrinjavanje invalidnih lica i drugih lica i dnevni boravak korisnika socijalne zaštite, dužni su uskladiti svoju djelatnost, akte i rad s ovim zakonom i propisima donesenim na osnovu njega u roku od 12 mjeseci od dana stupanja na snagu ovog zakona.“

Član 12

Član 112 mijenja se i glasi:

„Član 112

(1) Vlada će, na prijedlog šefa Odjeljenja, u roku od 6 mjeseci od dana stupanja na snagu ovog zakona donijeti pravilnike o:

- a) općim, tehničkim i stručnim uslovima za osnivanje i rad ustanove iz člana 81 stava 5 tačke 3,
- b) općim, tehničkim i stručnim uslovima za osnivanje i rad ustanove iz člana 81 stava 5 tačke 5,
- c) ocjenjivanju sposobnosti lica u postupku ostvarivanja prava iz socijalne zaštite iz člana 43 stava 8.

(2) Vlada će na prijedlog šefa Odjeljenje u roku od 12 mjeseci od dana stupanja na snagu ovog zakona donijeti pravilnike o:

- a) općim, tehničkim i stručnim uslovima za osnivanje i rad ustanova iz člana 81 stava 5 tački 1, 2 i 4,
- b) samostalnom obavljanju socijalne zaštite kao profesionalne djelatnosti.

(3) Vlada će, na prijedlog Odjeljenja uz saradnju s Odjeljenjem za raseljena lica, izbjeglice i stambena pitanja, u roku od 60 dana od dana stupanja na snagu ovog Zakona donijeti Pravilnik o uslovima i načinu rješavanja stambenih problema lica u stanju socijalne potrebe.”

Član 13

Iza člana 113 dodaje se novi član 113a koji glasi:

„Član 113a

(1) Na zahtjeve za dodatak za njegu i pomoć drugog lica, podnesene do početka primjene novih članova 43, 43a i 108a, primjenjivat će se član 43 Zakona o socijalnoj zaštiti Brčko distrikta Bosne i Hercegovine (Službeni glasnik Brčko distrikta BiH, brojevi: 1/03, 4/04, 19/07 i 2/08).

(2) Pododjeljenje za socijalnu zaštitu je dužno izvršiti reviziju rješenja za dodatak za njegu i pomoć od drugog lica, koja su donesena u skladu sa stavom 1 ovoga člana i uskladiti ih s ovim zakonom nakon početka primjene članova 43, 43a i 108a.“

Član 14

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH, a novi članovi 43, 43a i 108a će se primjenjivati po isteku 6 mjeseci od dana objavljivanja ovog zakona.

Broj: 01-02-391/18

Brčko, 23. 5. 2018. godine

PREDSJEDNIK
SKUPŠTINE BRČKO DISTRIKTA BiH

Esed Kadrić